

Jahresbericht vor Meitliriege 2018

Mir sie guet is nöie Turnerjahr gstartet.

Dr erst Alass isch dr seeländisch Jugendspiutag bi üs ds Stude gsi.

Gueti Wettkampfalage, super Wätter u viu motivierti Chind.

Im Ball über d Schnur hei sie um jede Punkt kämpft u mir hei mitgfieberet, aber leider hets kei Gruppe ufs Podest gschaftt.

Anders im Volleyball, dört hei d Meitli alli Matches gwunne. Do hei nid nume d Goldmedaillene gstrahlet...

Ds Trainingslager in Prêles für d Oberstufe het sech wieder glohnt. Ändlech gnueg Zit zum Üebe vor Gymnastik. 10 Meitli hei se nöi müesse lehre und es Spezialprogramm für die wo nid hei wöue tanze, het natürlech o nid dörfe fähle. Es Wucheändi wo sie sech besser hei chönne kenne lehre.

Am Kids run ds Biel, si mir leider nid eine vo de drei grösste Gruppe gsi u mir hei ke Zuestupf is Kässeli bercho. Topplätz si üs aber trotzdem gsicheret gsi, so het d Mia Reber zum dritte Mou i Folg, ihre erst Rang chönne verteidige....bravo!

Dr Höhepunkt isch u bleibt aber ds seeländische Turnfest.

Wie im letschte Jahr si mir o wieder mit dr Jugl Stude zäme gstartet. Es spezielles Turnfest, am Einzuwettkampf vor Jugend, hei nur d Johrgäng 2001 – 2004 chönne teilnäh. So si mir haut, o Verletzigsbedingt, nur mit 5 Meitli u 5 Jungs gange. Aui hei Superleistige erzielt.

Am Sunntig isch de dr Vereinswettkampf gsi. Mit über 80 Chind, i 8 verschiedene Diszipline, agfüüret vo gross u chli. E tolle, aber o asträngende Tag, wo mir Leiterinne u Leiter probiert hei, jedes Chind sine beste Möglichkeite idsetze, mängisch haut o am Team ds lieb.

D Stimmig unter de Chind u üs Leiter isch dr ganz Tag super gsi.

Es Highlight si sicher o d Finallöif vor Seelandstafette ihr Tissot Arena inne gsi.

Topleistige si erwartet worde u dir heit öies Beste gäh.

Dr zwöit Rang ihr höchste Stärkeklass, somit d Silbermedaille...das isch so megagigageil gsi, dass sogar ig es paar Fröideträndli ha verdrückt.

Es grosses MERCI a aui Leiter u Leiterinne, aune Häufer u üsne tröie Kampfrichter, denn ohni öich chönnte mir gar nid starte!

D Schlussstund im Summer mit Stafette u Grilliere, macht eifach Spass.

När heisst ab i die verdiente Summerferie.

Dr Turntag mit dr Fahneweihi vom TV Stude, isch o e glungne Tag gsi.

Vieli Jungturner u Jungturnerinne us beidne Turnvereine, hei mit ihrne Familie mitmacht.

«Das het eifach gfägt», hei mir mängisch chönne ghöre.

Super Anlass, schreit nach Wiederholig...

Ds Soirée isch wieder e mega Erfolg gsi.

Die spektakuläre Mondlandig mit de grüne, Freestyle tanzende Marsmönchli vor Unterstufe und o die UV – lüchtende Robotter Strich Meitli vor Oberstufe, si eifach super gsi.

Do geht me o dr Ideerichtum vo de Leiterinne u Fröid vo de Meitli... sie gö gärn id Meitliriege.

Für mi isch es Zit Adieu ds säge.

Wuche für Wuche d Meitli z begleite, ds motiviere jedes siner Leistige probiere ds verbessere, oder Spass bi de Spieli ds ha, das isch e super Erfahrung gsi u i wirde se sicher vermisse.

Nach 7 Jahr mit däm tolle Team, gib ig mis Amt us Meitliriege Leiterin ab.

Mire Nachfolgerin, dr Mara Gottardo, wünsch ig ganz viu Fröid mit dr nöie Herusforderig.

Für d Meitliriege

Denise Bohren